

Hibru Vahe

Avonkrezmi'nea Naneke

Anumzamo huvgare ke Nemofonku hu'nea neneke

- 1** ¹ Anumzamo'a korapara tagehe'mokizmia, kasnampa vahepi huvazino rama'a zupa ruzahu ruzahu kazigati kegaga huzami'ne. ² Hianagi menima vgare knafina Nemofompi huvazino keaga huramiana, e'i ana Mofavre'amofa azampinti ama mopa erifore hu'nemofa maka'zana erisinti harete'ne. ³ Ne'mofavre'amofompi Anumzamofa msazama'amo'a remsa nehigeno, Agrikna huno mani'neni, Agri'a hanave ke'areti maka'zana erigasefa huno nevuno, kumi'ma eri agruhu eri'zama eriteno, Marerisgahu Anumzamofa azantamaga kaziga monafinka mani'ne. ⁴ E'ina hu'negu ankerontamimofona zmagetereno rahi e'nerigeno, Anumzamo'ma Agima ami'nea agimo'a makamokizmia zmagaterene. ⁵ Na'ankure Anumzamo'a ina ankeronku huno, ***kagra Ne' Mofavreni'a manisnankena, menina, Nagra negafana manigahue?*** nehuno, ete mago'ane huno, ***Nagra negafana mani'nenugenka, Kagra Mofavreni'a manigahane?*** hu'ne. (Sam-Zga 2:7, 2 7:14, 1 Kro-Zam 17:13) ⁶ Hagi zage mofavre'ama avreno ama mopafima ne-eno'a, atrenkeno ana miko Anumzamofa ankeromo'za mono hunteho hu'ne. ⁷ Anumzamo'a ankerozga'agura huno, ***zamazeri zaho kna hugahue nehuno, eri'za vahe'agura zamazeri teve anefakna hugahue*** hu'ne. (Sam-Zga 104:4) ⁸ Hu'neanagi Ne' mofavre'agura huno, ***Anumzamoka, kinia mni'vava hugahane. Kagra ftago kavukavateti kinia maninka kegva hugahane.*** ⁹ ***Kagra fatgo zamofa avesinentenka kasegema rutagre avu'avazana kavesra hunentane. E'ina hu'negu Anumzamo'a kagri Anumzankino, magokama maninaza nagapinti kavreno musezamofa masave frenegante.*** (Sam-Zga 45:6,7) ¹⁰ ***Hagi Ramoka ese agafarera Kagra'a ama mopamofa trara tro nehunka, monafi me'nea zantamina Kagra'a kazampinti trohu'nane.*** ¹¹ ***Zamagra frigahazanangi, Kagra maninka nevananke'za,***

tavravemo atafareno havizahiankna mikamo'za hugahaze. ¹² *Kagra zamagrira harontafe eri ragazariankna hunezmantenanke'za, kukena hutreankna hugahazanagi, Kagra saganera osunka manivava hugahane.* (Sam-Zga 102:25-27)

¹³ Hianagi ina ankeronku Anumzamo'a huno, *kagra nazantamaga kaziga mani'negena ha' vaheka'a zamazeri kagra tra antaneno hu'ne?* (Sam-Zga 110:1) ¹⁴ Hagi ankeru vahera eri'za vahere, zamagra avamutaminkino Anumzamo'a zamahokeno zmavaresia vahete kegva huzamante'nigu huzmantege'za e'naze.

Anumzamo'ma tavreneana razane hu'nea naneke

2 ¹ Na'ankure e'ina agafare ko'ma antahi'nona kemofona antahini' nehuta atreta akoheta ogamu'a ovanune. ² Na'ankure Anumzamo ankeru vahepi huvazino nehia ke'mo'a, tamage huno efore nehie. Kasegema rutagrezane ke ontahizamofona, mizama'a me'ne hunesiana, ³ Anumzamo'ma tahoke'neazama tamagenama humisuta, tagra inankna huta rimpa hezana agateregahune? Ama ana tahoke'zana esetera Ramo hu'ama higeno, Agrite'ma zamentintima nehaza vahete amara higeta ke'none. ⁴ Anumzamo'a avamezampima, kaguvazampima, ruzahu ruzahu kaguvazampi huama nehuno, Avamumofu musezanena Agra'a avesite refko huno nezamie.

Anumzamo'ma tavre'neaza razana hu'nea naneke

⁵ Henkama esia mopaguma nehuna mopa, ankeru vahe'mo'za kva hiho huno huozamante'ne. ⁶ Hagi avontafepina anage hu'naze. *Vahera na'a mni'negenka kagra antahintahia hunemine? Vahe'mofo mofavregura antahinemine?* ⁷ *Kagra atupa knafi ankeru vahe'mokizmi zamagorga Agrira avrenentenka, msazanka'areti kini fetori antenentenka, husga hunentenka, makazama tro'ma huntanana zantera huntankeno kegva nehigenka, Kagra makazana Agri kvafi ante'nane.* ⁸ *Kagra maka'zana agri kvafi ante'nane.* Na'ankure mago'zamo'a agri kvafintira mani oganegahianki maka'zamo'a Agri kvafinke me'ne. Hianagi menima konana, maka'zamo'a Agri kvafina omanene. (Sam-Zga 8:4-6) ⁹ Osia knafi ankeru agorga azeri fenkate'nea nera tagra Jisasina kenone, menina azeri antesga huno msazama'areti kini fetori antente'ne. Hu'negu Anumzamo asuragirantenegu mikamotagu huno frizampina ufrene. ¹⁰ Ana miko'zana Anumzamofu zantami megeno, ana maka zantamina Agri'a hankavereti trohune. Hagi ana miko Anumzamofu mofavre nagara zamahokeno zamaza hanige'za masazama'afina manisazegu Anumzamo'a fatgo huno kumi'a omanenea Ne' Jisasina tamigeno atazana eri'ne.

¹¹ Na'ankure vahe'ma zamazeri agru hu'nemo'ene, agruma hu'naza nagamo'za, magoke ne'pinti fore hu'nazankino, nensaro nenafuo huno

huzankura agazea nosie. ¹²Agra anage hu'ne, ***Nagra nafuhemokizaminte kagia huama nehuna, ana miko vahe'ma atru hunesifi, zgamera huna kagika'a ahesaga hugahue.*** ¹³Mago'ane anage hu'ne, ***Nagra antahimina agripi namenantoe, Nagra Anumzamo'ma nami'nea mofavre zgane ama mani'noe*** hu'ne.

Jisasi'a tagri tazahuku fore hu'nea naneke

¹⁴Mofavre'mo'za zamavufgane korane mani'nagu, Agranena zamagrikna huno ama avufare eme frino, fri'zamofa hankavema sata'ma kinama hurante'nea hanavea azeri amnezankna hu'ne. ¹⁵Hagi fri'zamofa korozampima kazokzo eri'za vahekna hu'za kina hu'za mani'namokizmia kazufe zmantege'za fruhu'za mani'naze. ¹⁶Na'ankure Agra ankeru zmaza hu'nakura ome'neanki, Abrahamumpintima fore'ma hu'naza nagamokizmi zmaza hu'naku e'ne. ¹⁷E'ina hu'negu Agri'a nefune nesaroma hunentea avu'ava huno mika'zampina nehuno, Agra Anumzamofa avurera asuragiranteno ke'are oti fatgohu prisi ne' nemanino, vahe'mokizmia kumizmi nona huno magoke zupa apasezmante ne' mani'ne. ¹⁸Na'ankure Agra reheni kezampi ufreno ataza eri'nemo, tamarehe zampima unefrazamota tamaza hugahie.

Jisasi'a Mosesena agaterene hu'nea naneke

3 ¹E'ina hu'negu ruotage hu'naza mono nerafugata, tagrama huama nehuna Jisasinkura Aposol ne' mareri agaterenea prisi nere hutma antahi amiho. ²Mosesena tamage huno Anumzamo huhampri antegeni mika vahe'afi mani fatgo huno mni'neankna huno, huhampri ante'nemofonte Jisasi'a mani fatgo huno mani'ne. ³Hu'neanagi Jisasi'a Mosesena agatereno ra agi erigahie. Nomagi vahe'mo'zama noma ki'naza nomofoma agaterene'za ra zamagi enerizankna hugahie. ⁴Na'ankure ana miko nona vahe'mo'za negizanagi, Anumzamo mika'zana trohune. ⁵Mose'e'a mika vahe'afina eri'zana avariri fatgo huno eneria nekino, henkama fore'ma hanizamofa avame'za mni'ne. ⁶Hianagi Ne' mofavre'amo Kraisi'a Anumzamofa vahetera kva mani'ne. Hagi tagra ana vahe mani'nonankita, koro osu hankavetita nemanita, fore'ma hanigeta kesuna zanku'ma musema nehunazana otresune.

Zamentinti osu'zanku kva hanaza zamofa naneke

⁷Hu'negu Ruotge Avamumo huno, ***Menima Agri ageruma nentahisutma,*** ⁸***korapa ka'ma kopi tamagehe'mo'za Anumzamofa rehe'za ke'nazankna huno, tamagu'amo'a hankave otino.*** ⁹***40ti'a kafu zgefima kaguvazama erifore huge'za ke'nazanagi, tamagehemo'za renahe'za ke'naze*** ¹⁰***E'ina hu'negu, e'i ananknafi vahekura narimpa henezamante'na, anage hu'noe, zamagu'amo'a savri huvava nehige'za,***

Nagri kana kenira nosaze. ¹¹*Hu'negu narimpa he'zmantena huvempa hu'na, zamagra manifru kumanifina uofregosaze hu'noe.* (Sam-Zga 95:7-11, Eks-Uti 17:1-7) ¹²Nafuheta kva hu'neta kumi'mo'ene tamentinti osu'zamoma asimu anteno mni'nea Anumzamofonteti'ma, tamavretre zankura magoke magokemotma kva hiho.

¹³Hianagi menima knama me'nenire, mago magomotma ozeri hanaveti, azeri hanaveti maka kna nehinkeno, kumi'mofo havigemo'a rehiza huoramanteno. ¹⁴Na'ankure ese'ma Agritema ne-eta, tamentintima hu'nonazama azeri hankavetisuta, Kraisi'ene tragoteta vgaretera uhanatigahune. ¹⁵Avontafemo'a anage hu'ne, **Menina Agri ageruma nentahisuta, koma neramagehozama zmefima humi'nazaza huta, Agritera tamagu'a kafana eri'onkiho** hu'ne.

¹⁶Zamagra iza'za Anumzamofu ke nentahiza hara rente'naze? Zamagrira Mosese'a Isipitira zamavreno omenemozafi? ¹⁷Hagi Anumzamofona iza'za 40ti'a zage kafufina azeri rimpa he'naze? Zamagra ka'ma kokampima kumi'ma hu'za fri'nazamoze. ¹⁸Hagi inamokizmigu Anumzamo'a hankave ke huno, mani fruhu kuma ni'afina tamagerafa hu'za uofregahaze hu'ne? Zamagra ke'ama amage'ma onte'namoze. ¹⁹Tagra refkoma huta konana zamagra zamentintia osu'nazagu, ama ana vahe'mo'za manifruhu kumapima uofre'naze.

**Anumzamofu vahe'mo'za manigsa hanaza zanku
huvempa huzamante'nea naneke**

4 ¹E'ina hu'negu manifruhu kumapi ufregahaze huno huvempama hu'nea knama menesire, mago'tamimo'ma ana manifru hu kumapima uofre'zankura, kore nehutma kva hiho. ²Na'ankure koma Israeli vahe'tema knare musenkema huama hige'za antahi'nazaza hu'za huama hazageta nentahune. Hianagi anankema antahi'naza kemo'a zamaza osu'ne, na'ankure zmagra ana knare musenkerera zamentintia osu'nazageno'e. ³Na'ankure Anumzamo'ma hu'nea kante anteta tamentinti nehumotage manifruhu kumapina ufregahune. Esera ama mopama tro'ma hiregati mni fru hu kumara ko trohu vgareneankino, zmentitima nosaza nagakura Anumzamo huno, **Nagra Narimpa henezmate'na huvempa kenia huama nehuanki'za, zamagra tamage hu'za manifru kuma niafina uofregosaze.** ⁴Na'ankure avontafepina 7ni knazupa manifru huzankura anage hu'ne, **Anumzamo'a 7ni knazupa eri'zana atreno manifru nehie hu'ne.** (Jen-Agf 2:2)

⁵Hianagi mago'ane ama nanekefina huno, **zamagra manifruhu kumanifina uofregahaze** hu'ne. ⁶E'ina hu'negu manifru kumapima uofre'zamo'a ko me'neanagi, ese'ma knare musenkema huama hige'za antahi'namo'za uofre'nazana, na'ankure zmagra ke'ama amagama onte'nazazamo hige'za uofre'naze. ⁷Hu'negu Anumzamo'a manifruhu

kumapima ufrezankura rugna huhamprintene, e'i ana kna meninku Deviti ko hu'nea ke huno avontafepina hu'ne. **Hagi menina Nagrama Anumzamona kema nehanigeta nentahisuta, tamagu'a kafana eri onkiho hu'ne.**

⁸Hu'negu Josua'ma manifru kumama zamineresina, Anumzamo'a ru manifruhu knagura mago'ane kea osiresine. ⁹Hu'negu Anumzamo'ma eri'zama erivgareteno mni fru hu'neaza huno, mani fruhuzamo'a, Agri vahera zahufa zmavega ante'ne. ¹⁰Hu'negu iza'o Anumzamofu manifru zampima ufre'nakuma hanim'o'a, Aumzamoma ama mopama trohu vga reteno manifru hu'neaza hu'za, erizazmi eri vgarete'za manifru hugahaze.

¹¹E'ina hu'negu manifruhu kumapima ufre'zankura hankavenetita, ke ontahi vahe'mo'za ke runetrage'za fanane hunazankna huzankura kva hanune. ¹²Na'ankure Anumzamofu kemo'a kasefa huno me'neni, eri'za enerino, tarega kaziga asanenea kazimofu asenezama'a agatereno, kantu tagu tamemofone, avamutifine ufreno tagahu rurerure nehuno, kantu tagrunamo hagerafi'nefine, zaferinamofu asinu'afi ufreno tga nehuno, tavutavazane tagutagesamofu avesizana refko nehie.

¹³Mago'zamo'e huno Anumzamofu avurera, Agrama tro'ma hunte'nea zantamimo'a fraokigosie. Hianagi refkoma hanimofu avurera, ana maka'zamo'a amateke'za nehanigeta, tagranena tamage kege asamigahune.

Jisasi'a ugota prisi nere hu'nea naneke

¹⁴E'ina hu'negu tagrira mareri ageteresa prisi nera monafinka ufrenemofonte, Anumzamofu Ne' Mofavrere Jisasinte tamentintia azeri hankavetisune. ¹⁵Hu'negu tagrima antahineramino, asunku'ma hurantega ugota prisi ne'tia mani'ne. Na'ankure miko tagrama unefrona rehe'zampina Agranena ufreneanagi, kumira osu'ne. ¹⁶Hu'negu korera osu hanavetita asunku Anumzamofu tramofu avuga ne-eta, asunkuzane avesirantezanena, atupama hanuna knafina erinunkeno taza hugahie.

5 ¹Miko prisi vahera vahe'pinti zamavre'za huzamantage'za Anumzamofu avurera vahe'mokizmi zamagi eri'za mani'ne'za Anumzamofontega museza kre sramana vunente'za, kumiku kresramana vunte eri'za vahere. ²Hagi antahizazmi omne vahe'mo'zane kankuma hazagraza vahe'mokizimia agazone huzamanteno zamaza nehiane, na'ankure agra anahukna huno hanavea omnene. ³E'i ana agafare agra'a kumikura kresramana nevuno, vahe'mokizmi kumikura kre sramana vugahie. ⁴Ama ana eri'zana mago vahe'mo'a agra'a e'norianki, Aronima huntengeno eri'neaza huno, Anumzamo huzamantage'za e'nerize.

⁵Hu'negu Kraisi'a prisi vahe mani'noe huno agra'a azerintesga osu'neanki, azerintesgama hu'neana Anumzamo Agriku huno, **Kagra menina, Nagri mofavre manisankena, Nagra Negafana manigahue**

hu'ne. (Sam-Zga 2:7) ⁶Hagi mago kaziga avontafepina Anumzamo'a huno, ***Kagra manivava prisi, Melkisedeki kna hunka manigahane*** hu'ne. (Sam-Zga 110:4)

⁷Jisasi'ma ama mopafima mani'nenoa, fripinti Agri'ma azama hanimonfonku, Anumzamofontega kezatino zavineteno, nunamu huno antahinegegeno, Anumzamo'a nunamuma'a antahi ami'ne, na'ankure Agra Anumzamofono antahimizana me'nege'ne. ⁸Jisasi'a, Anumzamofono mofavre mani'neanagi, Agrama atazama eri'nea zampinti, kema antahino amage antezana rempi huno antahine. ⁹E'i ana atazama eri'nea agofetu Anumzamo'a fatgo nere hunteteno, maka Agri'ma amage'ma antaza vahe'mokizmirera, manivava hanagu zmahokenea zamofono agafa'a mani'ne. ¹⁰Hagi ko Anumzamo huno, Melkisedeki mni'neankna Ugota Prisi ne' efore hugahie huno hunte'nea nere.

Avamupima hagezanku hunea naneke

¹¹Rama'a ama nazamofono nanakea me'negeta tamasmi'naku hunanagi, eriamama huno tamasmi'amo'a amuhohie, na'ankure kema ame hutma antahi ama hu'zamo'a amuhonamerante ¹²Menina ko rempi hu'zami vahe manizaresinagi, tamagra zahufa aminte mofavregna nehutma hanave nezana negara osu'nazankita, avontafepintira Anumzamofono zankura mago'ane fruma hu'nesiaza rempi huramigahaze. ¹³Ami rima nemaniza vahe'mo'za mofavregna hu'nazankita, fatgo avu'avazane havi avu'avazane hu'za antahi amara nosaze. ¹⁴Hu'neanagi hanave nezana, nenama hu'ne'za, fatgozanki havizanki hu'za kenima nehu'za, fatgozama nehaza vahe'mokizmi nezane.

Kazigazi huta Anumzamofono avaririta vanuna naneke

6 ¹E'ina hu'negu Kraisinku'ma onensi mofavremofono hiaza huta repmima huneramuna zana netretma, nena vahe avamente mani'nenketa, ko'ma fri avu'avazampintima tamagu'a rukrehe hutma Anumzamofontetmentinti hiho huta tmasaminona kea, tamasami vava huta ovugahune. ²Mono tima frezamofono nanekegi, azama anteno nunamuma hu'zamofono nanekegi, fripinti'ma oti zamofono nanekegi, eteno henkama refko hanigeta manivava hanaza'zamofono naneke mago'ane huama huta tamasami vava osugahune. ³Anumzamo'ma hu izoma hurantenesigeta, amane anazana hugahune. ⁴Hianagi iza'zo koma huzamige'za nentahiza, monafi musezama ke'za antahiza nehu'za, Avamura e'neriza, ⁵Anumzamofono knare naneke ko eneriza, henkama esianknamofono hankave ke'za antahiza hu'nesamozama, ⁶atre'za megia' zante vute'za, etema e'za zamagu'ama eme rukrahema hu'zamo'a, tusi'a amuhonamantegahie. Na'ankure kefozama hazazamo'a, Anumzamofono Mofavrea mago'ane aheza keka zafare nehantiza, vahe avufina agazea eri nemize. ⁷Ko'mo'ma mopafi runteteno, avimzamo koti anivazu

huno hageno nena rga'a retegeno Anumzamo ana mopa asomura hunenteno, hozama hankorino avimazama hankrenemofa aza nehie. ⁸Hu'neanagi ave'ave trazamo'ene havi trazama nehagea mopa, magoa eri'za eriga osu'neankino, ana mopa Anumzamo hanigeno haviza hinkeno, tevemo tevgaregahie.

⁹Nafuheta tagra ama anahukna ke nehunanagi, tagra antahinone ama anazamo'a tamagritera fore osugahianki, tagra antahima tamunana knare tamavutnavama nehanageno, tamagu vazigahie huta nehune. ¹⁰Anumzamo'a mago'mofonkuke osu'ne'kino, amuhu huta eri'zama'ama erinenteta Agri'ma avesinenteta ruga'a mono vahema kegva huzmanteta nevaza zankura agera okanigahie. ¹¹Hianagi tagri'ma tavenesiana, kasefama huta ama mopare'ma mani'nenare vahe'ma avesintezana azeri hanavetineta vgare knarera unehanatita, amuhama hu'nemiza zana omerigahaze. ¹²E'ina hu'negu feru vahera omaniho. Hianagi amentintifine akohe'za avegante avu'avazampi manine'za huvempa huzmante'nea zantamima erisintihare'naza vahekna hiho.

Anumzamofa huvempa kegu amentinti huzamofa naneke

¹³Anumzamo huvempa kema Abrahamana hunteneana, magora Agri agetere anumzana omani'neankino Agra'a Agifi huvempa kea Abrahamana huntene. ¹⁴***Nagra tamage kagrira asomu hunegantena, kagripinti fore'ma hanaza vahera zamazeri ra hanenkeza rama'a vahe efore hugahaze*** hu'ne. (Jen-Agf 22:16, 17)

¹⁵Hu'negu akoheno avega anteno mni'neni Abrahamu'a, Anumzamo huvempama hunte'neazana erine. ¹⁶Hagi vahe'mo'zama huvempa kema hunakura, zamagrira zamagaterenea vahe'mofa zmagire hunte'za huvempa kezamia nehazageno, knazama amu'nozmfima me'neazana eriana higeno vga nere. ¹⁷Anahukna huno Anumzamo'a huvempa hu'neankino, anama huvempa hu'nea kemofona azeri hanavetino, erisanti haregahaze hu'nea vahetera huvempa huzmantene. ¹⁸Anumzamo'a huvempa hu'nea ke'ane, hugahuema hu'nea kemoke eri'ante amama hiana, Anumzamo'a havigea osugahie hu'ne. Ana hu'negu tagra maka havizama ne-enketa, Agritega freta vuta kasefa hanavea ome enerita, fore'ma hanigu tamentintima nehu'naza azeri hanavetigahune. ¹⁹Fore hanigu'ma tamentintima nehunazamo'a, ventemofa azerintegeni nemanianofikna nehuno, tagutamemofona azerino ra mono nomofona agu'afinka hantinaza tavaravemofona' agatereno ruotge hu'nefinka tamentintima nehuna zamo'a ome rusi nehie. ²⁰Jisasi'ma tagri tagi erino vugoteno ufrenemo, Melkisedeki nona erino mani'vava Ugota Prisi nera mani'ne.

Melkisedekima prisi mani'nea zamofa naneke

(Jen-Agf 14:17-20)

7 ¹Ama ana Melkisedeki'a Salemi vahe'mokizmi kini ne' mani'neni, marerisa Anumzamofa prisi ne' manine. Hagi Abrahamuma kini

vahe'ma ha'ma huno zamagatereteno, nevigeno'a karanka Melkisedeki'a tutagiha hunteno asomura huntene ²Higeno Abrahamu'a maka'zama erino e'nefintira, nazantrema'a kevu erinteno, refako huno mago kevua Melkisedekina ami'ne. Hagi Melkisedeki'e agimofu agu'agesamo'a, fatgo avu'avazamofu kini nere hu'ne. Nehuno Salemi kini nerema hu'nea agu'agesamo'a, rimpa fruzamofu kini nere hu'ne. ³Nerera'ene nefakea omanine, agigo azankomo'a omanigeno, kasente kna'a omanegeno, fri'nea agenke'a omanegeno, Anumzamofu mofavregna huno prisi ne mani vava hu'ne.

⁴Melkisedeki'a ra ne' mani'neanki antahiho. Abrahamu tagigomo agranena ra ne' mni'neanagi, hapintima eri'noma e'nea zantampintira nazantrema'a kevu refko huteno, anampintira knare'zantfama hu'nea kevua magora Melkisedekina ami'ne. ⁵Mosese kasegemo'a maka'zama antenesafintira 10ni'a nazantrema'a kevu refko hu'nesageno, mago kevua prisi vahe'mo'za erigahaze huno krente'ne. E'i anazana zmagra'a nagapinti ene erigahaze hu'ne. Na'ankure zamaganena Abrahamu naga mni'naze. ⁶Hianagi Melkisedeki'a Livai nagapintira omani'neanagi Abrahamu'ma nazantrema'a kevu refko hutenefintira, anampintira mago knare'zantfama hu'nea kevua eri'ne. Hagi Melkisedekia Abrahamuna asomura hunte'ne, ko'ma rama'azankuma huvempama hunte'nea nere. ⁷Hianagi mago kea huontegosune, asomuma nemia ne'mo'a asomu eneria nera agaterene. ⁸Prisi vahe'ma nazantrema'a kevu refko huntetena mago kevuma refakoma huta nezamuna vahe'mo'za fri vgare'naze. Melkisedekia zamagatereno ra vahe manine, na'ankure agrikura huama hu'za manino vugahie huno hu'ne. ⁹Livai nagamo'za nazantrema'a kevu refko hunte'nafinti mago kevua eneriza vahe'mo'za ko Abrahamupi Melkisedekina zmagra nazantrema'a kevu refko huntanafintira mago kevua ami'naze. ¹⁰Na'ankure Melkisedekima Abrahamuma tutagihama hunteno, nazantrema'a kevu refko huno mago kevuma ami'neana, agripintira Livai vahe'mo'za zahufa forera osu'nazegeno'e.

Melkisedeki'a Jisasi avamezankna huno mni'neazamofu naneke

¹¹Mosese kasegemo'a huno, Livai nagapintike prisi vahera manigahie huno hige'za mni'nazanagi, ana prisi vahe'mo'za mago vahera zmazeri knarera osu'nazagu mago Melkisedekikna prisi ne'ma fore'ma haniana, Aron nagapinti rompage, ru nagapinti fore'ma hanigeno knarera hugahie hu'ne. ¹²Ana hu'negu prisi eri'zamoma zahema nehanageno'a, tra ke mo'enena anahukna huno zahe hugahie. ¹³Na'ankure menima keagama nehuna prisi nera, kre sramanavu itare, kre sramna nevaza prisi vahepinti rompage ru nagapinti fore hugahie. ¹⁴Nagrama nehuana Rantimo'a Jiu nagapinti e'ne. Hagi Mosese'a ana nagapinti prisi vahera fore hugahie huno osu'nea nagapinti fore hu'ne.

¹⁵ Ama ana miko zantamimo'a eriamu huno, magora Melkisedeki kna prisi ne' menina efore nehie hu'ne. ¹⁶ Jisasi'ma prisi ne'ma mani'nena tagehe'mo'zama nehazaza huno Livai nagapinti prisi nera omani'neanki, manivava asimumofu hankave prisi ne' mani'ne. ¹⁷ Avontafemo'a agrikura huno, ***Melkisedeki kna hunka manivava prisi nere hu'ne***, (Sam-Zga 110:4)

¹⁸ Ama ana kanteti erizama'ama omane hankave'a omane korapa kesegea retufeganti atrene. ¹⁹ Na'ankure kasegemo'a ana mikozana eriknarera nosie. Hianagi knare'zama fore hugahiema huta amuhama hunemunazamo noma'a e'nerino Anumzamofonte tavreno urava'o nehie.

²⁰ Anumzamo Agra'a huvempa huno, Kraisi Agrake prisi nera mika zupa manigahie hu'ne. Hianagi mago'a prisi vahe'ma fore'ma hazageno'a, e'inahukna huvempa kea Anumzamo'a huozmante'ne. ²¹ Huvempa kema hu'neana, ***Nagra Ramo'na, huvempa ke hugantoankina antahintahini'a zahera osugahue. Kagra manivava prisi ne' manigahane*** hu'ne.

²² Na'ankure Anumzamo huvempama hunte'negu, Jisasi'a knare hagerafi huvempa kema tamigahue hu'nea Ne' mani'ne.

²³ Rama'a vahe'mo'za prisi eri'zana eri'naze, na'ankure zamagra nefrizageno, rumo'za eri'zazmia eritere hu'naze. ²⁴ Hianagi Jisasi'a manivava prisi ne' mni'nigeno, Agri prisi eri'zamo'a mevava hugahie.

²⁵ E'ina hu'negu Agrite'ma etenoma, Anumzamofontema esimofona magoke zupa agu'vazinkeno mni vava hugahie. Na'ankure Agra manivava hu'nenno, Anumzamofontega nunamu huno zamaza nehie.

²⁶ E'inahukna ugagota prisi ne'mo tazeri knarera hugahie. Na'ankure Agra ruotge huno kumi'a omanegenno kumi'mo magore huno azeri haviza osu'ne. Menina kumi vahepinti azeri ruotge higeno, monafinka ragi erino mani'ne. ²⁷ Agra ruga'a prisi vahe'mo'zama nehazaza huno mika kna kresrama vuvava nosie. Zamagra kumikura kresramana vute'za, vahe'mokizmi kumikura kre sramana nevazanagi, Jisasi'a magoke zupa Agra avufga eme aguza runo, maka vahe kumikura keka zafarera fri'ne. ²⁸ Na'ankure kasegemo'a hanavezami omane ugagota prisi vahe huhamprizante. Hianagi Anumzamo huvempa hunte'nea kemo'a kasegemofo amefi'a e'neana, Agri'a Ne'mofavremo mikazana emeri knare'zantfa nehuno manivava hugahie.

Kraisi'a ugota prisi ne' mni'ne hu'nea naneke

8 ¹ Tagrama nehunazamofu agafa'a ama'ne, tagrira Ugagota Prisi ne'tia monafinka mrieri agaterenea kini trate Anumzamofu azantamaga kaziga mani'ne. ² Agra monafinka tamame seri mono nomofu agu'afi Prisi eri'za eri ne' manino, eri'zana e'nerie. Ana seri mono nona vahe'mo'za zamazantetira onki'nazanki, Ramo ki'ne. ³ Miko ugota prisi vahe'mo'za musezane, kresramana vu'za eri'za ome kre sramana nevazankino, tagri

Ugagota Prisi Ne'mo kresramana vugahie. ⁴ Ama mopafima mani'neresina prisi nera omnisine, na'ankure kasegemoma hu'neaza hu'za ko rama'a ugagota prisi vahe mani'ne'za musezana eri'za Anumzamofontega kresramana vunentaze. ⁵ E'i ama mopafi mono nompri kresramana vu eri'zama enerizana, monafinkama tamazama me'nea zamofa avame'za me'ne. Na'ankure Mosesema seri mono noma kinakuma retro nehigeno'a, Anumzamo'a Mosesena hanave ke asamino, *e'sema ama agonare mikozama kaveri hu'noa kante antenka, seri nona kio huno huntene.* (Ekso-Uti 25:40)

⁶ Hianagi Jisasima eri'nea prisi eri'zamo'a mago'a prisi vahe'mo'zama e'neriza eri'zana agaterenegeno, Agra amuno ne' tagri'ene Anumzamofontera manino, koma huvempama hu'nea hagerafi, kea agatereno mani'ne. ⁷ Na'ankure kote hagerafi huvempa ke'mo'ma knare'zantfa huneresina, menina mago'ane henka hagerafi huvempa kea osiresine.

⁸ Hianagi vahepima Anumzamo hazenkema keno erifore nehuno'a, anage hu'ne, *Ramo'a huno Antahiho mago kna ne'eankina, ana knarera kasefa huvempa keni'a Israeli vahete ene Jiu vahe'motarera hugahue.* ⁹ *Ama ana hagerafi huvempa kenimo'a korapama nezamagehoma zamazante zamavazuhuna Isipi mopafinti zmvarena atineramina hunte'noa hagerafi huvempa kegnara osugahie. Zamagra ana hagerafi huvempa kerera mani fatgo osu'nazagu, Nagra namage'na huzami'noe huno Ramo'a hu'ne.* ¹⁰ *Hianagi Israeli vahetera ama kasefa hagerafi huvempa ke Ramo huno, henka'a Nagra kasegea antahintahi zmifine zamagu'afine krenentena, Nagra zamagri Anumza maninenke'za zamagra nagri vahe manigahaze hu'ne.* ¹¹ *Ana knazupa zamagra ko Ramofona ke'za antahiza hu'nazankiza, tava'o zamire'ma mani'nesaza vahema rempi huzami zankura osugahaze. Osi vahetetima vuno ra vahetema vaniana, magore hu'za rempi huzamiza tamagra Ramofona antahinazo hu'za osugahaze.* ¹² *Na'ankure nasunku hunezmante'na, Nagra kumizamia atrenezamante'na henka'a ana kumizamigura nagesa ontahigosue hu'ne.* (Jere 31:31-34)

¹³ Anumzamo'ma ama kasefa hagerafi huvempa kema nehuno'a kote hagerafi huvempa kegura huno, kna'amo'a vgarenkeno, ko'zama me'nesia zamofona eri'zama'a omanenkeno fanane hugahie hu'ne.

Jiu vahe'mokizmi ra mono nomofo naneke
(Lev-Pri 25:10-40)

9 ¹ Korapa hagerafi huvempa kemofona mono hu trake'a megeno mono hunte seri mono nona ama mopafina me'ne. ² Seri mono nompina tarefi hunaragintene. Ese'ma hunaragintepinka tavima rekrui hunte azota megeno, nezante sipa megeno ana agofetura breti me'ne.

E'i anama hunaragi ante'neama'agura ruotge hu'ne hu'za nehaze. ³Hagi anantera tavrave tafizageno amefiga'agura ruotage huno ruotge hu'ne hu'za hu'naze. ⁴Anampinka mananentake'za kre manavu ita korire tro huntenaza megeno, erihagerefi huvempe ke hu'za nehazaza vogisi zafareti trohu'naza me'ne. Ana vogisimofona agu'afina korire trohunaza kavofi mana neza megeno, Aroni azompare agatama hagenea megeno, hagerafi huvempama hu'nea kasegea haverera me'ne. ⁵Ana vogisimofa agofetura kumimofa nona huno apasezane, korireti tare masanentake ankeri tro huntengeno, znagekonanu rutareke ana vogisia refitakeno me'ne. Hianagi menina ana miko'zamofa agafa'a eri ama osugahue.

⁶E'i anazantamima ese hunaragintepima noma'arema eriante fatgoma hutegeno, prisi vahe'mo'za mazeriza atiramiza hu'za mono eri'zana e'nerize. ⁷Hianagi ugagota prisi ne'moke mago kafumofona, magoke kna zupa seri mono nomofa agu'afinka hunaragi antengeno ruotge huno, ruotge hu'nefinka, agra kumite'ene vahe'mo'za kefoza nehu'ne hu'za ontahine'za nehaza kumi apase kora erino unefre. (Lev-Pri 16:) ⁸E'i ana avu'avazampinti Ruotge Avamumo'a eriana huno seri nomofa kafanteti ufreta Anumzamofone vu'zama me'nesigeno'a Anumzamofoma keno antahinoma hu'zamo'a amuhu hugahie hu'ne. ⁹E'i ana seri mono nomo'a menima fore'ma haniaza taveri hu'ne. Na'ankure prisi vahe'mo'zama kre sramanama vazazamo'a zamagu zmagasafima me'nea antahintahizazmia zmazeri amara osugahie. ¹⁰Na'ankure ama ana avu'avazamo'a ne'za nezane ti nezane, tagiama tazama sesema huzamofonkuke nehuno, amegazama atupa'a knafima vgaresigeno'a, knarezama esiazanku hu'ne.

Kraisia tama kresramane hu'nea naneke

¹¹Hu'negu Kraisi'a ana miko knare zantamima esiazamofa Ugagota Prisi Ne' mani'ne. Agra monafinka mago vahe'mofa azamo tro osigeno, knarezantfa hu'nea seri nompri ufrene. ¹²Hagi magoke zupa miko knama kresramnama vuzankura Kraisi'a korana erino ruotge huno ruotge hu'nefinka ufrene. Hianagi e'i ana korana memene anenta kaomofa koranompaga, Agra'a koranuti tagu'vazino mni vavama hanunkura miza sene.

¹³Ko avu'avapina meme koranki, bulimakamofa koranki a' kasefa kaomofa tevefi krenaza osa'areti, pehenama hu'nesafintira zamazeri agru hugahie hu'za hu'naze. ¹⁴Hagi tamagesa antahiho, Kraisi koramo'a razankrefa me'neankino, fri avu'avazama nehunkeno tagutagesa azeri agru higeta, kasefa huno mni'nea Anumzamofona monora hunentone. Na'ankure manivava Avamumofa hankavere, Kraisi'a kefozama'a omne ne'mo, Anumzamofontera Agra'a avufga tagri kumikura aguza rune.

¹⁵E'i ana agafare Kraisi'a vahe'mokizmine Anumzamofa amu'no nera kasefa hagerafi huvempa kea mani'ne. Ana hu'negu huhamprima

zmantene'mo'za vahe'mo'za Anumzamo manivava maniza erisinti haregahaze hu'neazana erigahaze. Na'ankure Kraisi'a frino, kotema hagerafi kefi manine'za kumima hu'nazana kumizmia mizasezmanteno katufe zmante'ne. ¹⁶Mago vahe'mo'ma frisigeno fenezama'ama henkama erisinti haregahie huntene'imo'a, avegante'nenigeno ana nemo'a fritenkeno, ana zama'a erisinti haregahie. ¹⁷Na'ankure frisugenka erisanti haregahane hu'ne'mo'ma frisigeno, erisantima haresimo'a amne erigahie. Hagi amigahuema hunesimoma kasefa huno maninesigeno'a, magore huno anazama erisanti haregahane huno hunesizana e'origahie. ¹⁸E'i ana agafare zgagafamofo korantetira kote hagerafi huvempa kemofu eri hanaveti'naze.

¹⁹Na'ankure Mosesema Anumzamofu kasegema hamprinoma vahema nezamasino'a, anenta bulimakaomofu korane mememofu korana tine eri hava huteno, erino hisopue nehia trazamofu aninaretie'ene koranke hu'nea sipisipi azokateti Anumzamofu kasege me'nea avontafete ene vahetera, ana korana rutari hu'ne. ²⁰Huteno anage huno zamasmine, **ama koramo'a Anumzamo'ma hagerafi huvempa kema hiho huno tagrima hurante'nea eri hanavenetie.** (Diu-Kas 24:8) ²¹Ana kanteke, anahukna huno korana seri mono nonte'ene kresramnama nevaza eriza zantaminera rutri huntene. ²²Mosese kasegemo'ma hu'nea kanteke, tamage huno ana miko'zamo'a korantetike sesehu agru hugahie. Na'ankure mago zga aheno korana erifegu otreresina kumima atrentezana omaneresine. (Diu-Kas 24:6-8)

²³E'ina hu'negu ama mopafi seli mono none agu'afima me'nea zantaminena, monafinkama me'neazamofu avamezane, zga kfamofu koranteti azeri agru hugahie. Hianagi tamage zama monafinkama me'nea zantamina azeri agruma husniana, zga kfamofu korama agetere'nea koranteti azeri agru hugahie. ²⁴Na'ankure Kraisi'a vahe'mo azanu ki'nea mono nompina uofrene. Hagi mona kumapi tagriku huno Anumzamofontera amuno nera mani'ne. Mono hunte'naku kintenaza mono nompia Agra uofrene. Na'ankure monafinka me'nea mono nomofu avamezane. ²⁵Hagi e'ima uofreneana, Agra'a avufgama aguzama ru'neana, ama mopafi prisi vahe'mo'zama kafugu kafugu magoke knage'za ruotge hune hu'za nehazafi, zga kfamofu kora eri'za ufre'za kresramana vuvava hazanknara osu'ne. ²⁶Hanki anara hugara hu'nesiana, ama mopama troma huneregatira fri vava huno visine. Hianagi anara osu'ne. Kumi'mofu hanavema eri atrenaku, Agra'a avufga tagrikure huno vgare knafi avufga agu'za runo magoke zupa, ana maka knamofonkura fri'ne. ²⁷Hu'negu vahe'mofonku'ma hunteneana, magoke zupa fritesuno'a kegagarera otigahie huno huntene. ²⁸Hu'negu Kraisi'a magoke zupa frino rama'a vahe kumira eritrezamtene. Agrama henkama esu'no'a kumiti eritrerante'nakura omegahianki, Agriku'ma tusiza hu'za avegama ante'namokizmi zmahokeno zmvarenaku egahie.

Kraisia magoke zupa miko vahekura fri'neazamofonaneke

10 ¹Ko avu'avazama Mosese kasegefi me'neana henka knare'zama esiazamofoname'za me'ne. Hu'negu ko avu'avazampima mago'anena anahukna zana huvava hu'za kafugu kafugura vugahazanagi, monoma huntenaku'ma haza vahe'mokizmi, ana zamo'azamazeri agru osutfahu'ne. ²Hagi koma kresramna nevaza'zamoma monoma nehaza vahe'mokizmi kumi'ma sese hu'neresina, kresramna vuvava nosu'za, zamagu zmagasafina kumi me'ne hu'za ontahizasine. ³Hu'neanagi e'i ana kresramnamo'afafugu kafuguma hu'naza kumimofohuzmagesa hutere nehie. ⁴Na'ankure burimakaomofokoramo ene mememofokoramo'akumira sese hugara osu'ne. ⁵E'i ana agafare Kraisima amamopafima ne-eno'a Anumzamofona anage huno asamine, **Vahe'mofokumitema zgagfa korama kre sramnama vuzankura kavenosie. Hianagi Kagri kemofomage antesuegu amavufga nami'nane.** ⁶Kumitema zga kfama mika kre sramna vuzankura, **Kagra musena nosane.** ⁷Nagra anage nehue, koma Anumzamoka avontafemo Nagriku hu'nea kante, **Kagri kavesi avaririnaku ama e'noe** hu'ne. (Sam-Zga 40:6-8) ⁸Kasegemo'a rempi huramino, kresramna vuzane musezane erinka enka kumika'agura kre sramnavuo hu'ne. Hianagi nahigeno Kraisia ama ana zankura huama huno Anumzamofona avenosie hu'ne? ⁹Anantera Agra anage hu'ne, **Kagri kavesiza avaririnaku Nagra e'noe** hu'ne. Agra ese hagerafi huvempa kea eri netreno, henka huvempa ke eri agafahu'ne. (Sam-Zga 40:7-8) ¹⁰Jisas Kraisia Anumzamofonavesite Agra'avaufga magoke zupa tamigeno mika kna, mika vahera tazeri ruotge hu'ne.

¹¹Knane knane prisi vahe'mo'za otine'za mono eri'zazamige'za ana hukna hu'za kre sramana vuvava nehazazamo'akumiti eritregara osu'ne.

¹²Hianagi tagri Ugagota Prisi nemo'amagoke zupa tagri knare zanku, Agra'avaufga Anumzamofonamigeno, kumitigura avufa aguzarutegeno, **Agra Anumzamofonazantamaga kaziga mani'ne.** (Sam-Zga 110:1)

¹³Agra anante avega anteno mani'negeno, **ha'marentetaza vahera zmavre agafi antegeno, zmagra aga tra trohu'za mni'naze.** ¹⁴Na'ankure magoke zupa avufga agu'zaru'nea zamo, zmazeri ruotge hu'nazanagamokizmia, miko zupa zamazeri knare'zantfa nehie.

¹⁵Ruotge Avamumo'ama ana zankura tagritera huama huno esera anage hu'ne, ¹⁶**Vahe'niarera kasefa hagerafi huvempa kea ana knarera hugahue huno Ramo'ahu'ne. Nagra kasegea zamagu'afi nentena antahintahizamifi krentegahue** hu'ne. (Jer 31:33-34) ¹⁷Anantera anage hune, **Kumi nehu'zasegema rutagre zmavuzmava nehaza zankura, Nagra mago'ene nagesa ontahigosue** hu'ne. ¹⁸Hagi ko'makumi'ma atrentenesigeno'a, mago'ane kumikura kresramna ovugosie.

Hanavetino kazigazi huno vuzamofo naneke

¹⁹E'ina hu'negu nafuheta hanavetita Jisasi koranteti azeri Ruotge hu'nefinka ufrenune. ²⁰Jisasima tagriku'ma fri'neazamo, kasefa huno asimu eri kama tavravemo runkaniregeno, Ruotgema hu'nefinka kana anagirante'ne. ²¹Hagi tagri Mreri Agatere Prisi Ne'mo, Anumzamofu vahetera kegva hu'negu, ²²erinketa tamage tagu'areti Anumzamofontera antahinemita urava'o hamneno. Na'ankure havi tagutagesamofona, Kraisi koranu tagino sesehu agru higeno tavufgamofona sese hurantene. ²³Fore hugahie huta tamentinti nehuta huama nehuna zana azeri hanavetisune. Na'ankure huvempama hurantenemo'a hugahuema hu'neazana amanehu nere. ²⁴Hagi mago magomotma hanavetita ovesinte avesinte huzanku'ene, knare eri'zama erizankura nentahisunkeno, vahepina eama hanie. ²⁵Jisasi'ma esia knamo'a kofta nehigu, mago'amo'zama magopima atruma hu'zama netrazaza huta, magopima atruma hu'zana otresune. Tamagra antahinaze, Kraisi'ma esiakna hago kofta nehigu, ozeri hanaveti azeri hanaveti hanune.

Kraisima tamagena huomisnuna naneke

²⁶Nafuheta ko'ma tamage kema antahinetama, kumi'ma huvava hanunana, mago'anena ana kumi'ma eriatre kre sramana vu'zana omnegosie. ²⁷Hianagi Anumzamo'ma refkoma hurante zankura tusi kore nehuta, Anumzamofu ha'renentesia vahe'ma amuhonentake tevefima tasegesagu avega antegahaze. ²⁸Hagi iza'o Mosesese kasegemofu agorga'a omanigeno, taremo'o 3'amo'o kete'za ana zanku'ma huama huntege'za, asunkura hunontazanki ahenefrize. (Diu-Kas 17:2-6) ²⁹Hagi, Anumzamofu Mofavrema amagena hunemino, hagerafi huvempa kema kumitima sese hu'nea korama ke'amne zankna nehuno, Anumzamofu asunku'zama vahetegama avreno ne-ea Ruotage Avamumofu arimpa knaza erimisia vahe'mofona, tusi'a kefo'za huntegehianki antahiho. ³⁰Na'ankure tagra antahi'none, Anumzamo'a amanage hu'ne, ***Nagra nona hu'na hara hugahue. Nagra nona huna mizana zamigahue.*** Agra mago'ane hune, ***Nagra nona hu'na mizana zamigahue.*** Agra ete mago'ane hune, ***Ramo Agra'a vahera refko huzmantegahie*** hu'ne. Antahi'none, ³¹kasefa huno mni'nea Anumzamo magomofu azeri haviza hu'naku haniana, ana ne'mo'a koro hugahie.

Hankavetita fatgo huta manisuna naneke

³²Ese'ma Kraisima antahinka kenka hunana knare ete antahigeno vino. Kagesa antahio, tusi'a hazenke zana fore higeno, tusi katazana fore hu'neanagi kamentintia otrenane. ³³Mago'a zupa vahe avufi kazeri ama hu'za kaheza katazana kami'naze. Anahukna hu'za mago'a zupa zmahe'za

zmatama zamiza vahera zamaza hu'nane. ³⁴Kagra kina nompima zamavrentaza vahe enena magoka zamagranena kata enerinka, miko zanka'ama erizagenka muse nehunka, zmatranke'za e'nerize. Na'ankure mevava knare fenozanka'a monafi me'negenka kagra antahinane.

³⁵Hu'negu e'i ana hanave kamentintima Ramofontema hunte'nana zana otro. Na'ankure ana hanave kamentintiretira tusi'a miza erigahane.

³⁶Akohenka maninenka knazana erinka vanunka, Anumzamofa avesi nevaririnka, Anumzamo'ma huhampri kante'neazana erigahane.

³⁷Na'ankure kofta knafi *egahiema hunemo'a avegaonte, ko egahie.*

³⁸*Hu'negu fatgo vahe'mo'za zamentintifi manigahaze. Hianagi iza'o amagenama hunamino natre'noma vanimofona musena huontegosue hu'ne.*

³⁹Hianagi Anumzamofonteti atre'zama nevu'za fanane hnaza vaheknara tagra osanunanki, tagra hugahunema hu'naza nehuna nagakita, taguvaziza erisuna vahe mani'none.

Korapama zmentinti hu'naza vahemofa naneke

11 ¹Amentintima hu'zana, onke'nona zamofa tamage huno fore hugahie huta amuhama nehuna zane. ²Korapa vahe'mo'za zamentinti hu'nazagu, Anumzamo'a fatgo vahere huno huzmantene. ³Tamentinti nehunku, Anumzamo'a ke'areti ama mopane, monanena trohune huta antahi amara nehune. Ana hu'negu menima tavuma negona zana, Anumzamo'a nonkona zanteti tro hu'ne. (Jen-Agf 4:3-10)

⁴Ebeli'a amentinti Anumzamofonte nehuno kre sramana vunte'neazamo, Keni'ma kre sramana vunte'neazana agaterene. Ebeli'a amentinti higeno Anumzamo'a fatgo nere huno huso'e huntene. Ebeli'a ko fri'neanagi amentinti hu'neazamo tagrira meninena hunerasamie. (Jen-Agf 5:21-24)

⁵Enoku'a amentinti higu Anumzamo avregeno ofrineno, monafinka marerigeno onke'naze. Na'ankure ofrino mni'nerera Anumzamofa avurera fatgo huno mni'negeno, Anumzamo muse huntene avare'ne.

⁶Amentintima omane'nesigeno'a, Anumzamofa aveszama avaririzamo'a amuhu huntegahie. Na'ankure iza'o Anumzamofontema esimo'a, agra amentintima haniana, Anumzana mni'neankino, Agriku'ma hakaza vahera mizana nezamie huno antahino. (Jen-Agf 6:13-22)

⁷Anumzamo'a Noana asamigeno amentinti ana kegura nehuno, amageanteno tima hagesifima naga'a zamagu vazisigura ventea tro hu'ne. Fore'ma osu'nea knaza fore hugahie huno Anumzamo'a asamine. Noama amentinti hu'neazamo, ama mopafi vahe'mofa kefo avu'avazazmia eriamia nehigeno, Anumzamo'a fatgo nere huno huntene. (Jen-Agf 12:1-8)

⁸Abrahamu'ma henkama erisinti haresia kumate vinogu Anumzamo'ma huntengeno'a, inankna kumate vinogu huntene ontahi'neanagi, amentinti

nehuno ke amageanteno vu'ne. ⁹Hagi Abrahamu'a Anumzamo'ma hunte'nea moparera amentinti nehuno zoka vahekna huno, seri no ome kino umanine. Ana higeno Asaki'ene Jekopukea anahukna huke Anumzamo'a huvempama hunte'nea zana erisintiharegane hunte'nea netrene magoka ana seri nompina umani'naze. ¹⁰Hakare zupa Abrahamu'a amentinti nehuno, henkama hanave ranku'ma Anumzamo retro hunteteno, Agra'a ki'nea ranku'ma erisigu aveganteno manine. ¹¹Sera'enena tavavategeno avufgamo'a haviza hu'neanagi, amentinti nehuno Anumzamo'ma huvempa hu'nea kemo'a nena'a fore hugahie higu, mofavre kasentene. (Jen-Agf 17:19, 18:11-14, 21:2) ¹²Hagi magoke ne' Abrahamu ozafarenea nepinti, maka fore hu'naza vahe'mo'za, monafi hanafi kna nehu'za, hagerinkenafi kahepankna hu'za ohampriga vahe mni'naze.

¹³Ama ana miko vahe'ma fri'nazana, huvempama huzmante'neazana e'orine'za fri'nazanagi, zamagra zmentinti nehu'za, afete'ma ne-eazama kenaza zankura muse nehu'za, ruregati zoka vahekna hu'za emani'naze. ¹⁴E'ina hukna kema nehaza vahe'mo'za, zamagrama umani so'ema hanaza kumaku nehakaze. ¹⁵Zamagrama e'naza kumategama vunakuma antahintahima hazasina, ete e'naza kumatega vazasine. ¹⁶Hianagi knarema hu'nea kumaku nehakazana mona kumare. E'ina hu'negu Anumzamo'a tamagri Anumza mni'noe huzankura, Agra agazea osugahie. Na'ankure Agra mago ranku'ma retro huzmantene.

¹⁷Anumzamo'a Abrahamuna amentinti reraheno kenaku, Aisakina ahenka kre sramana vunanto hu'ne. Huvempa kema huntentemo Abrahamu'a amentinti nehuno, magoke mofavrea Aisakina ahe fri'za hu'ne. ¹⁸Anumzamo'a Abrahamunku hu'neana, ***Aisakipinti fore hanaza vaheku, Abrahamu ageheze huno hugahaze huntene.*** (Jen-Agf 1:12) ¹⁹Abrahamuma agesama antahi'neana, Aisakima ahe frisugeno'a Anumzamo asimura ete amigahie huno agesa antahine. Hagi ana hu'negu nemofoma avreneazamo frizampinti avrenea avame'za huraveri hu'ne. (Jen-Agf 22:1-18)

²⁰Aisaki'a amentinti hu'negu, Jekopu'ene Isokea henka'a erisa'a asomu kea huvempa huznantene. (Jen-Agf 27:27-29, 39-40) ²¹Jekopu'a amentinti hu'negu, fri'zama nehuno'a Josefena tare mofavreararena asomura hu'nezantenteno kepri huno azompare otineno, monora Anumzamofona huntene. (Jen-Agf 48) ²²Josefe'a amentinti hu'negu, frinaku'ma nehuno'a, hanavetino Israeli vahekura, Isipima atreta vanutma zaferinani'a ramina erineta viho huno huzmantene. (Jen-Agf 50:24-25)

²³Mosese nererake nefakea zanamentinti hu'naku, Mosesema kasentegenoa 3'a ikamofu agu'afina azeri frakintakeno znaganena mani'ne. Na'ankure zanagra ka'ana ana mofavremo'a hentofa mofavre maninegeke, kini nemofo kasegema rutagre zankura korera osu'na'e.

(Eks-Uti 1:22, 2:1-15) ²⁴Mosese'a amentinti hu'negu, zomareno rama nehuno'a Fero mofamofu mofavre hu'za agrikuma huzankura avesra hu'ne. ²⁵Anumzamofu vahe'ma zamazeri havizama hazaza hu'za azeri haviza huzanku agesa nentahino, atupa knafi kumimofu kefo avu'avazampi muse huzankura avesra hu'ne. ²⁶Agra Isipi kumamofu feno erizankura nontahino, Kraisintekuma natama erisuana knare hugahie huno agesa antahine. Na'ankure Anumzamoma henkama ra mizama amizanku anara hu'ne. ²⁷Mosese'a amentinti hu'negu kini ne'mo'ma arimpa ahentezankura koro osu Isipi mopa atreno vu'ne. Na'ankure agra onkenemofonte avuraga kenteno kazigazi huno vu'ne. ²⁸Mosese'a amentinti hu'negu, Israeli vahera zamasimge'za sipsipi ahe'za korana nonkafa zamirera frenazageno, Anumzamofu ankeromo ozamahe zmagaterene. (Eks-Uti 12:21-30)

²⁹Israeli vahe'mo'za Anumzamofonte zmentinti hu'nazagu, hagege moparema hiaza hu'za hagerina takahe'naze. Hianagi Isipi vahe'mo'za anama hazaza hu'za taka henaku hu'nazanagi, ti nakrinaze. (Eks-Uti 14:21-31)

³⁰Israeli vahe'mo'za Anumzamofonte zametinti hu'nazagu, 7ni'a knafina Jeriko kumara kagizageno, vihu keginamo'a fragu vaziramine. (Jos 6:12-21) ³¹Rehapu monko a'mo'agi Anumzamofonte amentinti nehuno, tare afure vahetrena znaza huno zanazeri frakinegu, kuma ane vahe'mo'za keontahiza vahema zmahe frifina agrira ahe ofrine. (Jos 2:1-21, 6:22-25)

³²Hagi na'ane hu'na mago'anena hugahue? Gidionima, Barakima, Samsonima, Jeptama, Devitima, Samueliki, kasanampa vahe'mokizmi zamagenkema tamasamisua knani'a nagrira omne'nene. ³³E'i ana zamentintima haza vahe'mo'za ru kumate vahema ha'ma huzmantazana zmagatenere'za, fatgo zamavuzmava hazagu huvempama hu'nea zana enerizageno, laionimo'a zmaheno none'ne. ³⁴Zamagra tusi'a tevema nereantevea resu nehazageno, kazintetira zamahe friga osu'naze. Zamagrira hanavezmi omaneneanagi hanave vahe nese'za, hapina hanavetiza ha' vahe zamia zamarotago hu'naze. ³⁵A'nemo'za zamavesi nentaza vahe'ma fri'nea vahera azeri otige'za nezmavrazageno, mago'amokizmia kanona zamizanagi, Anumzamofona otre kazigazi hu'za amage'anteza nevu'za, zamagra fripinti oti'za knare zmasimuma erisaza zanku antahintahi hu'naze. ³⁶Mago'amokizmia kiza zokago ke hu'nezamante'za sefu kanonkeve zamiza zmvavuga zmahe tragatrago nehu'za, mago'amokizmi'a kina rezmante'za zamavre'za kina hu'nezmantaze. ³⁷Mago'amokizmia have knonu zamahe nefrizageno, mago'a mokizmia sonteti refragi tare nehazageno, mago'amokizmi kaziknonu zamahe fri'ne. Hanki mago'mo'za sipsipine meme akrute kukena nehu'za, zamagara netegeni, zmazeri haviza hu'naze. ³⁸Ama

mopafi vahe'mo'za knarera huozamantege'za, ka'ma kokampine, agonafine, have kampima, kerigampina masetere hu'za vano hu'naze.

³⁹E'i ana maka vahe'mo'za zmentinti hazagu, Anumzamo'a hugnare huzmantene. Hu'neanagi Anumzamo'ma huvempa huzamante'nea zana e'orine'za fri'naze. ⁴⁰Ama anazantamina Anumzamo'a knarezantami retro hurantegeneno me'neankino, zamagrama koma erizankura Anumzamo'a avenosianki, tagranema magoka omerisunegu retro hurantene.

Jisasinte negeta tamentinti hanuna naneke

12 ¹E'i ana hu'negu korapama Anumzamofontema zamentintima hu'naza vahe'moza, hamponkna hu'za regagirantenazagu, tazeri knama nehia zane, kumimo'enema rugagino tazeneria zana netreta, Anumzamo'ma tagima hu'nea agamareno tragi zokagopina tagareta kazigazi huta vanune. ²Tagra tavuraga Jisasinte kentesune, tamentintima azeri knarema huzamofo agafa'a mani'ne. Na'ankure Agranena musezamo avega'antenegeneno, agazegura osuno kazigazi huno knazana erino keka zafarera vuteno, menina Anumzamomofo azantamaga kaziga mareri agaterenea tratera mani'ne.

³Kumi vahe'mo'zama e'inahukna knazama Jisasima amizageno kazigazi huno erino vu'neazanku, nentahita tamagu'a kragogo onkita tamentintia otreho. ⁴Kumi'ma agaterenaku'ma hama hutama e'nafina, korana oraginaze.

⁵Hagi tamagra tamagekaninazo, Anumzamo'ma tamazeri hanaveti nanekema mofavre naga'agna huno tavumaroma anteneana anage hu'ne, ***Mofavre'nimoka Anumzamo tamavumaroma antesia zankura amnezane huta antahi oza osiho, tamazeri fatgoma hunaku'ma hanave kema nehanigeno'a tamagu'amo'a kragogo onkino.*** ⁶***Na'ankure Anumzamo'a avesinte'nemofona, azeri fatgo nehie. Na'ankure Nagri mofavre huno himofona, kano amino azeri fatgo nehie*** hu'ne. (Prov-Knr 3:11, 12)

⁷Anumzamo'a Agri mofavregna hu'nageno knazana neramie hutma nentahita kazigazi huta knazana erita viho. Na'ankure ina mofavremomofo nefa'a avumrora nonte huta hugahune. ⁸Anumzamo'a ana miko mofavre zga'a zamazeri fatgo nehie. Hagi kagrima kazeri fatgoma osanigenka, kagra nerera'ene nefa omani mofavregna hugahane. ⁹Hagi ama mopafi nerafaza tazeri fatgoma hazageta antahinezamune. Hagi tagrama avamupi, Nerafa agorga anteramita manisunana manivava osugahunu? ¹⁰Na'ankure ama mopafi nerafaza antahi'naza avamente onasia kafufima manisunku tazeri fatgo nehaze. Hianagi Anumzamoma tazeri fatgoma nehia zamo'a knare'zantfa hu'negu, Agri ruotage zampina manigahune. ¹¹Avumroma antezana musezana omane'neanki atafi ufregahie. Hianagi e'inahukna kantema maninesuno'a, henka mizana arimpa fru erino manigahie.

¹²E'ina hu'negu hanave'a omanea kzane kahirahima nerea krena erinte fatgo huo. ¹³Kagamoma vania kana erintefatgo nehugeno, hanavezmi

nomanegenog zamagamo haviza hu'nesia vahe'mo'za, oti hanavenetiza trakara osu'za kavaririza viho.

¹⁴Miko vahe'enena hanavetinka karimpa fru hunka nemaninka, mani ruotage nehunka, agru hunka manio. Na'ankure mni ruotage osunesimo'a Ramofona onkegahie. ¹⁵Anumzamofa asunkuzampintima evuramizankura ogava agava hiho. Atrenkeno tamarimpa hezamo'a, tamagu'afina akara heno hazenkezana avreno omena, anazantetira miko vahe'mo'za havizana osiho. ¹⁶Atrenkeno kefo avu'avazamo'a tamazeri traka nosina, koma Isoma Anumzamofa amagena hunenteno, ese mofavremo eri asomuma atreneakna osiho. ¹⁷Henkama ana asomuma erinakura agu'areti zavineteno, agu'a rukrahe huno asunkura hu'neanagi agra e'orine. (Jen-Agf 27:30-40)

¹⁸Tamagra ama mopafi Sainai agonare teve anefa nehigeno, haninenkigeno, hanave zahoko netigeno, Israeli vahe'mo'za hu'nazankna agonare ome'naze. ¹⁹Ufe neregeno, mago vahe'mo kezatino nehige'za, Israeli vahe'mo'za zamagogogu nehu'za, Mosesena asamiza hugeno taganeno hu'naze. ²⁰Na'ankure Anumzamoma zamasimia nanekegura koro hu'naze. **Zagakafamo'enema ana agonarema erava'o hanigenka havenu ahefriho** hune. (Eks-Uti 19:13) ²¹Ana zama fore'ma hige'za ke'naza zankura tusi koro nehazageno, Mosese enena tusiza huno koro nehuno, **nagranena nahirahi neregena koro nehue** huno hu'ne. (Eks-Uti 19:12-22, 20:18-21) ²²Hu'neanagi kagra ko Saion agonare, kasefa huno mni'nea Anumzamofa kumapi monafinka Jerusale kumate, hampriga osu'nea ankeri kevu'mo'za muse hu'za mni'nafi ehanatinane. ²³Kagra Anumzamofa zage mofavremokizmi zamagi'a monafinka krentenege'za atru hu'nafi e'nane. Kagra Anumzamofonte mika vahe refko nehia Nete e'nane. Miza sezamantege'za fatgo huza agru huza mni'naza vahe'mofo avamuzmimo mni'nea kumate kagra e'nane. ²⁴Jisasi'ma amuno ne'mo'ma kasefa hagerafi huvempa kema huno kora tagitre'nea koramo'a, Ebeli korana agaterenea Nete e'enane.

Kva hanuna naneke

²⁵Kema neramasamia Anumzamofa kema rutregezankura kava hiho. Na'ankure Israeli vahe'mo'za Sainai agonareti kema zamasamige'za rutagre'nazana Agrira agate'orenazanki, tagra inakna huta monafinti kema rutragesunana Agrira agateregahune? ²⁶Agrama Sainai agonare'ma kema nehigeno'a, agerumo'a ama mopa azeri tore hu'ne. Hianagi Agra huvempa huno, **Nagra mago'anena mopagera eritore osugahuanki, monane eritore hugahue** hu'ne. (Hag 2:6) ²⁷E'inahu kema hu'neana, Anumzamoma ana miko tro'ma hunte'nea zantamimo'a tagosi hanigeno, tagosi'ma osania zantamimo'a mevava hugahie.

²⁸E'ina hu'negu tagrama e'neruna kumara eri tagosi osu hanavenentake kuma e'nerune. Hu'negu Anumzamofona muse hunenteta, tagu'a

anteramita Agri'ma avesinigeno muse hania mono huntésune.

²⁹Na'ankure tagri Anumzamo'a srasra huno teno erivgare tevegna hu'ne.

Mono nagamo'za ovesinte avesinte hnaza zamofó naneke

13 ¹Mono nagamota ovesinte avesitema hu avu'ava'zantamimo'a meno vino. ²Ketma antahitma osu'nesaza vahe'ma ne-esagetama nontamifi zamavrente zankura tamagera okanino. Na'ankure mago'amo'za korapara ontahine'za nozamifina zmvarentenazana, ankeró vahe anara huzamante'naze. (Jen-Agf 18:1–19:1) ³Hagi kina nompima mani'nesamokizmia kagerakani ozmantenka, kagranema kina nompima mani'nenoma hiaza hunka, kagesa antahizamio. Vahe'mo'za zmazeri haviza hanage'za zmatazampima mni'nesaza vahe'mokizmia, tamagera akani ozmanteta, tagranema tata zampima mni'nenoma hiaza huta knazmia eriho. ⁴Aravema huno a'ane ve'anema manifatgoma huno mni'zana, raza amunontamifina meno, hagi aravema osu' vahe'mo'ma monkozama hanimofone, koma aravema hu'nesimoma atreno, ru vene a'ene monko avu'ava'zama hanimofona, Anumzamo keaga huzmantegahie. ⁵Zagoguma avesi avesi huntézankura kava huo, anama erinesanama'agura museho, na'ankure Anumzamo'a anage hu'ne, ***Nagra kagrira onkatre'na, Nagra namagena huogamigahue*** hu'ne. (Diu-Kas 31:6-8, Jos 1:5) ⁶Hu'negu tagra antahinemita, hanavetita anage hugahune, ***Ramo'a nazahina mani'nogu nagra korera osugahue. Na'a vahetfamo'a hunantegahie?*** hugahune. (Sam-Zga 118:6)

⁷Vugotama huramantenaza vahe'mozama Anumzamofó nanekema tamasminaza kegu tamagesa antahiho. Nomani zazmia refako huta negeta tamentintifina, zamagrikna huta maniho. ⁸Jisas Kraisi'a okima mani'neakna huno menina mani'nenó, anahukna huno hakare'a knafina manivava hugahie. ⁹Hu'negu atrenkeno ruzahu ruzahu kasefa antahintahizamo'a tamavazu huno afetera ovino. Tamaguamofona atrenkeno Anumzamofó asunkuzamo tamazeri hakavetino, mago'amo'za zmvu'zmava'zama avaririza ne'zama retro'ma hu'za nezamo'a, tamazeri hanavea notie. ¹⁰Kre sramanavu itatia, tagrira me'neankino, seri mono nompima eri'zama eneri'za prisi vahe'mo'za onetfa hugahaze. ¹¹Jiu vahe'mokizmi zmvu'zmvapina vugota prisi vahe'mo'za kumimofó nona hu'za zgagfa korana eri'za ruotage'ma hu'nefinka unefraze. Hianagi zgagfamofó zamavufga eri'za kuma'mofona fegi'a negraze. (Lev-Pri 16:27) ¹²Ana hu'negu Jisasi'a vahe'amokizmi kumizmi zmazeri agruma huno zamazeri ruotge hanigura, rankumamofó kasampinti atiramino fegia avufga aguzaruno korana tagine. ¹³Hu'negu kuma'mofó fegu'a Agrite nevuta, Agrama hu'neaza huta tagazezana erigahune. ¹⁴Na'ankure ama mni'nonana rankumatia zoka kumate mani'none, hu'negu tagra henkama ne-ea rankumaku avega anteta mani'none. ¹⁵Ana hu'negu Jisas Agifi,

tagrati tavufga Anumzamofona ami vganereta, ra agia ami'vava nehuta, Agri Agima tagipinti huama hunazamo rga'a fore nehie. ¹⁶Hagi knare tamavu'tamavama nehuta, atupama hanaza vahe'ma zamaza huzankura tamagera okaniho. Na'ankure e'inahukna avu'avapima tagra'ama amivgareta amizankura, Anumzamo'a muse nehie.

¹⁷Vugotama hurmantenesimofona agorga nemanita, ke'zamia amage anteho. Na'ankure zamagra tamagri tamagu'are kegva nehu'za, henkama Anumzamofa refako huzampina tamagri tamagenkema hu'ama hanaza vahe mani'naze. Hagi ana eri'zama erisazana zamatrenke'za musezampinti e'neri'za zamata e'oriho, na'ankure ana zamo'a tamaza osugahie.

¹⁸Nunamuna huranteho, tagra antahunana antahintahitimo'a ama' hu'negeta mikazama hanumpina fatgoza hanunegu tavenesie. ¹⁹Nagra hanavetina tamantahigoanki, nunamu nehinkena tamagritega koftahu'na aneno.

Hu vgare naneke

²⁰Hagi arimpa fru Anumzamo, ugagota sipisipi afu kva ne' Ranti Jisasina fri'nefinti azeri oti'nemofa korama'areti, mevava hagerafi huvempa ke hu'ne. ²¹Agri avesizama'a avaririzantema upama hanarera, maka knare zama'areti tamazeri knare hugahie. Hakare'zana Jisas Kraisimpi nehanunkeno Anumzamo'a muse hanie. Hakarea ra agia Agrake erivava hanie. Tamage.

²²Hagi nafuheta hanavetina ama upa avoma kreramuana tamagesa antahi'so'e hiho. ²³Nagra tamasamuana, ko nerafu Timotina kinafinitira kazufetre'naze. Agrama esige'na, avare'na tamagritega vugahu'e. ²⁴Kava vahetamine, maka mono naga'motarega musenke atreramantoe. Italima mani'naza mono nagamo'zanena musenkea hurmantaze. ²⁵Anumzamofa asunku zamo'a maka nagamotare mesie.